

PCN LO ORGANISA KONGRESO RIBA PENSHUN OBLIGATORIO

Kralendijk- Fondo di penshun PCN riba dia 15 di novèmber lo organisá un kongreso riba e tópiko di penshun obligatorio. PCN ta responsabel pa e penshun di empleadonan di gobièrnu i esnan ku ta traha den kuido i den esenansa. Sinembargo, esaki ta djies un parti di e poblashon ku ta traha.

Ku e kongreso PCN, for di un sentimentu di responsabilidadat komun, ke aportá na e diskushon tokante un penshun general. Ku un sistema di penshun asina, sparmentu pa un penshun lo bira algo automatiko i obligatorio pa tur hende ku ta traha den sektor privá, i ku ainda no ta partisipá den ningun areglo di penshun.

“Ta bon pa realisá ku mayoria hende riba nos islanan no tin niun sorto di penshun adishonal, riba e montante di AOV ku nan ta kobra”, asina Harald Linkels, presidente di e PCN ta splika. “Por bisa ku esnan ku ta kai bou di PCN ta un grupo previligiá den nos komunidad pasombra nan tin un penshun bon reglá i relativamente sigur. Pero mayoria empleado den sektor privá tin ku biba solamente di nan AOV ora nan yega edat di 65 ana”, segun Linkels.

E presidente di PCN ta bisa ku for di diferente estudio, manera esun di Nibud pero tambe esun mas resien di Regioplan, ta sali na kla ku un hende tin mester di masoméno 1100 pa luna, kasi dòbel e montante di AOV aktual.

Pa medio di e kongreso, PCN ke kontribuí na e diskushon tokante introdukshon di un penshun general, pa tur hende ku ta trahando, pero ku no ta afiliá ainda na un areglo di penshun. Durante e kongreso lo tin diferente oradó ku ta papia tokante sistemanan di penshun riba e islanan di karibe hulandes, lo repasá e manera ku a regla un penshun obligatorio na Aruba i lo repasá diferente manera ku lo por yega na un penshun general na Boneiru, St. Eustatius i Saba.

E presidente di PCN ta di opinion ku a partnernan shoshal mester tuma responsabilidadat propio p’e problemátika di un penshun general riba e islanan. “Nos por keda wak den direkshon di hulanda, pero na momentu dado nos tin ku bin tambe ku iniciativa propio i tuma propio responsabilidadat. No tin niun pakiko ku dononan di trabou, gobièrnunan i sindikato lo no por yega na un kombenio pa un penshun ku ta kubri tur hende, di un forma ku tur hende lo tin un penshun adishonal ora nan yega edat di penshun”, segun Linkels ta bisa.

Segun Linkels, e asosiasion di sindikato na Boneiru, Usibo, pa algun tempu kaba ta boga pa introdukshon di un penshun adishonal general, pero te ainda no a logra un iniciativa kargá dor di tur partido involví pa yega na un areglo asina.

Dentro di poko PCN lo duna mas informashon riba e kongreso ku lo tuma luga dia 15 di novèmber próksimo.

Potret: direktiva di PCN (di rpd), Roy Hooker, Harald Linkels, Gerard Bergsma i Valdemar Marcha.
Photo credit: Michel Groen

